

**Nunatsinni innarluutillit pisortat namminersortullu suliffeqarfiutaanni ajornannginnerusumik sulilersinnaanissaat aqutissiuunneqaqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut**  
*(Siverth K. Heilmann aamma Knud Kristiansen, Atassut)*

**pillugu**

**Inuussutissarsiornermut Ataatsimiititaliap**

**ISUMALIUTISSIISUTAA**

**siunnersuutip aappassaaneerreqarneranut saqqummiunneqartuq**

Inuussutissarsiornermut Ataatsimiititaliap suliarinninnerani peqataapput:  
Inatsisartunut ilaasortaq Naaja Nathanielsen, Inuit Ataqatigiit, siulittaasoq  
Inatsisartunut ilaasortaq Andreas Uldum, Demokraterne, siulittaasup tullia  
Inatsisartunut ilaasortaq Kim Kielsen, Siumut  
Inatsisartunut ilaasortaq Akitsinnguaq Olsen, Siumut  
Inatsisartunut ilaasortaq Knud Fleischer, Kattusseqatigiit Partiiat  
Inatsisartunut ilaasortaq Aqqaluaq B. Egede, Inuit Ataqatigiit  
Inatsisartunut ilaasortaq Karl Lyberth, Siumut  
Inatsisartunut ilaasortaq Sivert K. Heilmann (sinniisoq)

UKA2012-imi siullermeerinninnerup kingorna ataatsimiititaliap siunnersuut misissuataarsimavaa matumuunalu isumaliutini Inatsisartunut saqqummiullugit. Inuussutissarsiornermut Ataatsimiititaliap maluginiarpaa Naalakkersuisut siunnersuutip akuerineqarnissaanik inassuteqartut. Ataatsimiititaliap taamatuttaaq maluginiarpaa partiit oqaaseqartuisa amerlanerit siunnersuut ilassilluaraat.

### **1. Siunnersuutio imarisai siunertaalu**

Siunnersuuteqartut aalajangiiffigisassatut siunnersuutimikkut matumuuna kissaatigaat, nunatsinni innarluutillit pisortat namminersortullu suliffeqarfiutaanni ajornannginnerusumik sulilersinnaanissaat aqutissiuunneqassasoq.

### **2. Ataatsimiititaliap siunnersuummik suliarinninnera**

Inuussutissarsiornermut Ataatsimiititaliap isumaqarpoq aalajangiiffigisassatut siunnersuutikut saqqummiunneqartukkut innuttaaqatitta innarluutillit maannakkornit annerusumik suliffeqarnermut qanoq peqataatinneqarnerulersinnaanerannik apeqqut pingaarutilik tikinneqartuq. Ataatsimiititaliap naatsorsuutigaa Naalakkersuisut aalajangiiffigisassatut siunnersuutip

akueringarnerata malitsigisaanik erseqqissarniarumaaraat qanoq ililluni innarluutillit suliffeqarnermut akuunerulernissamut periarfissaqarnerulernissaat qularnaarneqarsinnaanersoq.

Ataatsimiititaliap paasinninnera unaavoq innarluutillit ilaqartut siusinaartumik soraarnerussutisartunik, naak taakku ilarpassui qularnanngitsumik pissutsit apeqqutaallutik suliaqarnisaminnut piukkunnarsinnaagaluartut. Ataatsimiititaliap naatsorsuutigaa aalajangiiffigisassatut siunnersuutikkut anguniarneqartoq piviusunngussappat taava tamanna ungasinnerusoq isigalugu innarluutillit amerlanerusut innuttaasulluunniit allat killilimmik sulisinnaassuseqartut suli amerlanerusut inuiaqatigiit kalaallit ineriartornerannut akulerusimanerulernissaannut peqataajumaartoq.

Ataatsimiititaliap maluginiarpaa Naalakkersuisut akissuteqaamminni oqaatigimmassuk nunarput tamakkerlugu inuit 400-ut missaat sulisinnaalarseqqinniarneqarsimasut, ataatsimiititaliallu tamanna pissusissamisoortutut isigaa neriullunilu tamatumani pitsaasunik ineriartorneq siunissami sakkortusarneqarsinnaassasoq, inuit amerlanerusut pisinnaasaminnik piginnaasaminnillu suliffeqarnermi atuisinnaanissaminnik periarfissinneqarnerisigut. Qularnanngilaq siunnerfilimmik paasisitsiniaanikkut annikillisamik sulisinnaanermut aaqqiisuussinerit ullumikkut inatsisitigut periarfissaareersut atorlugit namminersortut pisortallu innarluutilinnik killilimmilluunniit sulisinnaassusilinnik atorfinitsitsisinaanerat eqqumaffigineqarnerulersinnaassasoq.

Kommunit inuussutissarsiortullu akornanni sunniivigeqatigiittarnerup ingerlaavartumik ineriartortinneqarnera taamatuttaaq aqquassaasinnaavoq sulisinnaalarseqqinniakkap/innarluutillip aamma sulisitsisup qajassuartumik annikillisamilluunniit suliffissanik pilersitsinikkut inuiaqatigiinni akisussaaffimmik tiguserusuttup akornanni attaveqaatinik attuumassuteqarfinnillu amerlanerusunik pilersitsisoqarsinnaaneranut. Tamatumunnga atatillugu ataatsimiititaliap nuannaarutissaasorivaa nunatsinni inuussutissarsiortut akornanni suliffeqarfiit inuttut atugarisatigut inuiaqatigiinnullu akisussaaffinnik annerujartuinnartumik pingaartitsileriartormata.

Namminersorlutik inuussutissarsiuteqartut taamatut peqataarusussuseqarnerat ilaatigut erserinneqarsimavoq suliniaqatigiiffiup CSR-Greenlandip, nunatsinni suliffeqarfinit pingaaruti-linnit arlalinnit peqataaffigineqartup, pilersinneqarneratigut. Suliniaqatigiiffiup pilersinneqarneranut isumaqatigiisummi ilaatigut atuarneqarsinnaavoq suliffeqarfiit ilaasortaausut ingerlatsinerminni isiginiagassat assigiinngitsut eqqarsaatigineqartarnissaat sulissutigisagaat, taakku-nunnga ilaallutik inuttut atugarisat inuiaqatigiillu eqqarsaatigalugit tamatigoortumik isiginiagassat. Ataatsimiititaliap neriutigaa taamatut nammineq piuumassutsimik pimoorussineq siu-nissami sakkortusarneqarumaartoq inuiaqatigiinni sanngiinnerusortatta suliniarfineqarnerat eqqarsaatigalugu kivitsisussat amerlaneroqqullugit.

Tamatumunnga atatillugu pisortat, Namminersorlutik Oqartussat ilanngullugit, suliffissanik inunnut killilimmik sulisinnaassusilinnut innarluutilinnulluunniit naleqquttunik ineriartortitsinissamut periarfissaqarluarput. Tassungali ilanngunneqassaaq naak suliffeqarfiit namminersortut tamatumunnga piumassuseqarlutillu tamatuminnga siunertaqartaraluartut taava pingitsoorneqarsinnaaneq ajormat sulisinnaalerseqqinniakkap innarluutililluunniip sulisinnaassusiata piginnaasaasalu suliffeqarfiup ingerlatseriaasianut isertitatarnissamillu pisari-aqartitsineranut sanilliullugit isiginiarneqartariaqarnerannik.

Pisortat taamatut annertutigisumik taakkuninnga isiginninniartariaqanngillat taamaattumillu tamatumunnga atatillugu Namminersorlutik Oqartussat siuttuunissaminnut periarfissaqarlutik. Ataatsimiititaliap maluginiarpaa Naalakkersuisut akissuteqaamminni oqaatigimmassuk innarluutilinnut inuusuttunut sammisumik ilinniartitsinikkut suliniarneq sakkortusarneqartariaqar-toq inuusuttut pineqartut innarluuteqarnerminnut naleqquttunik ilinniagaqarnissaminnut neqe-roorfigineqarsinnaalernerisigut. Ataatsimiititaliap tamanna isumaqatigaa.

Naggataatigut ataatsimiititaliap oqaatigissavaa inuttut peqqissutsikkullu atugarisat allarpassuit innarluutilit inuunerannut periarfissaannullu sunniuteqartarmata, soorlu peqqinnissakut sulinneqarnerit, ineqarnikkut atugarisat il.il. Ataatsimiititaliali pissutsit tamakku isumaliutissiisummi matumani annerusumik samminngilai apeqqutit qulequttallu tamakku Inuussutissarsiornermut Ataatsimiititalip suliassaqarfiinut ilaangimmata.

### **3. Siunnersuutip aningaasatigut kingunerisassai**

Siuliini oqaatigineqartut ataatsimiititaliap maluginiarpaa siunnersuutip akuerineqarnissaa Naalakkersuisut inassutigigaat. Taamaalilluni ataatsimiititaliap aamma naatsorsuutigaa tamatumana aningaasatigut kingunerisassat Naalakkersuisut qulaajarsimagaat. Tamanna tunngavigalugu ataatsimiititaliap naatsorsuutigaa Naalakkersuisut naliliisimassasut siunnersuummi siunertarineqartut timitalerneqarnissaat aningaasaliissutaareersut iluanni pisinnaassasoq aningaa-sanik atuinerusariaqarnermik malitseqarani. Siunnersuutip timitalerneqarnera naatsorsuutigi-sat akimorlugit pisortat karsiinut aningaasartuuteqarnerulermik nassataqassagaluarpat ani-ngaasartutit taakkua aningaasaliissutaareersunit aningaasartuutigineqartariaqassapput, taamalu suliuniutaareersut allat pingaarnersiunerimi tunulliuttariaqalerlutik.

### **4. Ataatsimiititaliap inassuteqaatai**

Ataatsimiititaliap isumaqatigiittup siunnersuutip akuerineqarnissaa inassuteqaatigaa.

Taamatut oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappassaaniigassanngortippaa.

Nadp

Siulittaasoq

[Signature]

[Signature]

for: Pule Heik

Appelooq B. Egede

[Signature]

K. Carl